

Ka Shithi U Apostol Paul Sha Ki Nong Kolossai

1 ¹Ka jingkhublei na u Paul, u apostol U Jisu Khrist da ka mon U Blei, kumjuh ruh na u Timothi, u para jong ngi ha U Khrist.

²Ha ki riewkhuid bad ki parabangeit ba iaineh ha U Khrist, kiba ha Kolossai.

Ka jingaiei bad ka jingsuk sha phi na U Blei uba U Kpa jong ngi.

³Borabor ngi ainguh ia U Blei U Kpa jong U Jisu Khrist uba U Trai jong ngi da kaba duwai na ka bynta jong phi, ⁴haba ngi la iohsngew shaphang ka jingngeit jong phi ha U Khrist Jisu bad ia ka jingieid ba phi don na ka bynta ki riewkhuid baroh. ⁵Phi la iaineh skhem ha ka jingngeit bad ka jingieid namar ba phi tip kaei kaba ap ia phi ha bneng—kata ka jingkyrmen kaba phi la iohpdiang naduh ka sngi mynba phi la iohsngew nyngkong eh ia ka khubor bashisha ka Gospel ⁶ia kaba la ialap sha phi bad kaba la saphriang ruh kylleng ka pyrthei, naduh kata ka sngi kaba phi la iohsngew nyngkong eh ia ka bad phi la sngewthuh ia ka jingshisha shaphang ka jingaiei U Blei. ⁷Phi la iohsngew ia ka na u Epaphras, u paralok bad u para nongtrei baieid jong ngi uba long u shakri ba iaineh jong U Khrist na ka bynta jong ngi. ⁸U la iathuh ruh ha ngi ia ka jingieid kaba phi don ha U Mynsiem.

⁹Naduh ka sngi ba ngi la iohsngew ia kine kiei kiei, ngim man thait shuh ban duwai na ka bynta jong phi bad kane ka dei ka jingduwai jong ngi ba:

U Blei un ai ha phi ia ka jingsngewskhem ban tip ia ka mon jong u da ka jingstad bad ka jingshemphang ba kynja mynsiem baroh; ¹⁰bad kane kan iarap ia phi ban im ka jingim kaba pyndonburom bad pynsngewbha eh ia U Trai ha kiei kiei baroh; bad ba ka jingim jong phi kan nang ioh seisoh da ki jingleh babha baroh bad ba phin nangroi ruh ha ka jingtip ia U Blei; ¹¹ba U Blei un nang pynshaitbor ia phi da ka bor bah jong u, ba kumta phin lah ban iaishah bad ban ym phaidien noh haba wan ki jingeh.

Kumta da kaba sngewkmen eh ¹²phin ainguh ia U Kpa uba la ibit ban pyniohbynta ha phi ia kata kaba u la kular ban ai ha ki riewkhuid jong u, kiba im ha ka jingshai. ¹³U Blei u la pyllaitluid ia ngi na ka bor jong ka jingdum bad u la wallam ia ngi sha ka hima jong U Khun baieid eh jong u, ¹⁴uba la siewspah ia ngi da ka snam jong u bad ha uba ngi ioh ruh ia ka jingmab ia ki pop jong ngi.

Ka Jinglong Blei U Khrist

¹⁵Ym don uba lah ban iohi ia U Blei, hynrei U Khun u long ka dur jong U Blei.

Uta keiñ uba la kha nyngkong na ki jingthaw baroh.

¹⁶Da ka bor jong u la thaw ia kiei kiei baroh:

kiba ha bneng bad kiba ha pyrthei, kiba iohi bad ki bymlah ban iohi—ki jingsynshar ba kynja mynsiem, ki jinglong trai, ki bor bad ki iktiar. Ia kiei kiei baroh la thaw da u bad na ka bynta jong u.

¹⁷U Khun u la don hangta shuwa ban pynlong ia kiei kiei baroh.

Kiei kiei baroh ki ianeh lang ha u.

¹⁸U long u khlieh jong ka met, kaba long ka balang.

U long ka jingsdang ia kiei kiei baroh. Bad u long ma u, uba nyngkong eh uba la miempat na kiba iap. Kumta u long halor kiei kiei baroh.

¹⁹U Blei u la sngewbha ba ka jingdap pura jong u kan shong tylli ha U Khun.

²⁰Bad lyngba jong u, U Blei u la mon ban wallam biang ia kiei kiei baroh shalade hi—kiba ha khyndew bad kiba ha bneng, haba u la pyniasuk da ka snam U Khun jong u kaba u la pynmih halor ka diengphna.

²¹Mynno mynno phi long kiba la jngai noh na U Blei, phi long ki nongshun jong u ha la ki jingmut, namar kita ki jingleh

bymman jong phi kiba long pyrshah ia u.²²Hynrei mynta sa shisien pat u la pynlong ia phi ki lok jong u da ka jingiap kaba U Khrist u la shah mynba u dang don ha ka met. U la leh ia kane khnang ba un ioh pynieng ia phi halade hi ki brierw ki bakhuid, kiba khlem pop bad kiba khlem kano kano ka jingthohbria hakmat jong u.²³Kane kan sa jia tang lada phi iaineh skhem ban ngeit ha ka Gospel kaba phi la iohsngew bad ba la pynskhem ruh ha ka nongrim jong ka jingngeit. Wat khiih noh na kata ka jingkyrmen ka Gospel kaba phi la pdiang. Kane ka dei kata ka Gospel kaba la ialap ha kita baroh kiba ha pyrthei, ia kaba la pynlong ruh ia nga u Paul u nongialap.

Ka Jingshakri U Paul Ia Ka Balang

²⁴Nga kmen ha ki jingsshah shitom jong nga na ka bynta jong phi bad la pyndap noh ha ka doh jong nga ia ki jingsshah shitom kiba U Khrist u dang dei ban shah na ka bynta ka met jong u, kaba long ka balang.²⁵Nga la kylla long u nongialap ban pyndep ia ka kam kaba U Blei u la aiti ha nga na ka bynta jong phi ia ka ban iathuh ia ka khubor ba pura jong U Blei.²⁶Kane ka long ka khubor jong ka jingmaian ia kaba la buhrieh naduh ki ia mynbarim bad na ki pateng bynriew baroh, hynrei mynta la pynpaw ia ka ha ki riewkhuid jong U Blei.²⁷U Blei u la mon ban pyntip ia kane ha la ki jong ki brierw, kaba katno ka jingkyrrei spah bad ka burom jong kata ka jingmaian na ka bynta ki brierw baroh kaba long, U Khrist ha phi, ka jingkyrmen ka burom.²⁸Kumta ngi iai bteng ban ialap ha ki brierw shaphang U Khrist da ka jingstad baroh ban iasyllok bad hikai khnang ban pynieng ia uwei-pa-uwei hakmat U Blei kiba la san bad kiba la kot sha ka jinglong rangbah ba kynja mynsiem ha U Khrist.²⁹Na ka bynta kane, nga trei bad ialeh tynggeh da ka bor bah U Khrist kaba u la ai ha nga bad kaba trei ruh ha ka jingim jong nga.

2¹Nga kwah ba phin tip katno ba nga la ialeh shitom ban iarap ia phi bad ia kito kiba ha Laodikaia bad ia kiwei pat ki bym pat ju iohi ia nga.²Nga kwah ia ki ba kin long kiba khlain bad kiba iatylli lang ha ka jingieid bad ka jingsngewskhem da ka jingiasngewthuh jingmut, khnang ba kin ioh tip ia ka jingmaian kaba U Blei u la pynpaw kaba long U Khrist hi.³Ha u la buhrieh tyngkai ia baroh ka spah bah jong ka jingstad bad ka jingtip.

⁴Nga iathuh ia kane ha phi khnang ban

ym don mano mano ban shukor ia phi da ki ktien pnah pynban kiba pynbakla.⁵Wat la nga don sha jngai, ki jingmut jong nga borabor ki don bad phi. Nga kmen ban iohi ia ka jingmanbha jong phi bad ia ka jingngeit ba skhem jong phi ha U Khrist.

To Iaineh Ha Kaba Bud Ia U Khrist Jisu

⁶Kumba phi la pdiang ia U Khrist Jisu kum U Trai jong phi, kumta to iaiaid ha u.⁷Phi dei ban snoh skhem tang ha U Khrist, da kaba kjit ia ka jingim bad ka bor na u. Kumba la hikai ha phi ia ka jingshisha, kumta to nangroi ha ka jingshemphang jong ka bad wat man thait ban ainguh ia U Blei.

⁸To sumar bha ba phin ym shah rong noh da ki jinghikai ba thala jong kito kiba thmu ban shukor ia phi. Kita ki jinghikai kim long na U Khrist hynrei ki dei tang ki jinghikai hiar pateng jong ki brierw bad kiba wan na ki bor kiba trei ha kane ka pyrthei.⁹Nga ong ia kane namar ka jingdapbiang jong U Blei ka shong tylli ha U Khrist, wat mynba u dang don ha ka met jong u hangne ha pyrthei.¹⁰Bad namar ba phi long ki jong U Khrist phi long kiba dap biang ha kiei kiei baroh. U Khrist u synshar halor ki bor bad ki iktiar baroh.

¹¹Ha U Khrist ia phi ruh la otsher, ym kumba la leh da ka kti ki brierw, hynrei ka jingotsher kaba U Khrist u la leh, kaba long ka jingpyllaitluid ia phi na ka bor jong ka pop kaba ha ka doh.¹²Mynba la pynbaptis ia phi, la btep lem ia phi bad U Khrist bad la pynmihpat ia phi da ka jingngeit jong phi ha ka bor U Blei kaba u la pynpaw mynba u la pynmihpat ia U Khrist na kiba iap.

¹³Phi la iap noh ha kaba kynja mynsiem namar ki pop jong phi bad namar ba phim pat lait na ka bor jong ka pop kaba ha ka doh. Hynrei U Blei u la ai ha phi ka jingim ba thymmai lem bad U Khrist bad u la mab noh ia baroh ki pop jong ngi.

¹⁴Namar ba ngi la ryngkang ia ka hukum U Blei, ngi long ki nongkit ram—ka ram kaba kynthup lut ia ki kyndon jong ka baroh kiba ngim shymlah ban bud. Hynrei U Blei u la pyndam noh ia kata ka ram jong ngi da kaba u la sahnar ia ka ha ka diengphna.¹⁵U la pynjot thiaiw ia ki nongsynshar bad ki bor jingdum ka kynja mynsiem. Halor ka diengphna u la jop ia ki, u da pynrem, pynduh bor bad thad rong ruh ia ki ha kaba paw hakmat ka pyrthei baroh.

Ki Rukom Pateng-La-Pateng

¹⁶Namar kata wat ai ba uno uno un bishar ia phi shaphang kaba bam bad kaba dih

lane shaphang ka dustur ki Jiw kum ka jingkhawai, ka jingrakhe ia u Bnai Thymmai, lane shaphang ki sngi Sabbatton.¹⁷Kine kiba long tang kum ka syrngiew ia kiei kiei ki ban sa wan jia, hynrei kata ka met ka long ka jong U Khrist.¹⁸Don ki briew kiba shu leh mynleh sngewrit, kiba mane ia ki angel bad kiba shu kren beit tang ia ki jingiohipaw. Wat shahshkor ia ki haba ki ong ba phi bakla ba phi khlem leh ia kita kiei kiei kum ma ki. Kata ka jingsarong jong ki ka paw kum ka jingbieit, namar ki pynshong nongrim tang ha ki jingpyrkhat ba kynja briew.¹⁹Kiba kum kine kim shah ha ka jingpyniaid jong u khlieh uba long U Khrist ha uba ka met baroh kawei ka pyndem ha u. Namar ha U Khrist baroh ki dkhoh ta ka met ki sumar bad ki iarap markylliang iwei ia iwei pat. Kumta kata ka met ka khlaia bad ka iasoh lang kawei kumba U Blei u pynsan ia ka.

²⁰Phi la ia p noh lem bad U Khrist bad la pyllaitluid ia phi na ki bor kiba trei ha ka pyrthei. Te balei pat phi dang leh la kumba phi dang dei jong ka pyrthei? Nga mut ban ong, balei phi bud ia ki adong kiba kum kine: ²¹“Wat bam ia kane,” “Wat mad ia katai,” “Wat ktah ia ka tei?”²²Kiba kum kine ki adong ki dei tang ia kiei kiei jong kane ka pyrthei ki ban kut noh hadien ba la pyndonkam ia ki, kiba long tang ki adong bad ki jinghikai ba kynja briew.²³Kiba kum kine ki adong ki paw kumba ki don ia ka jingstad, ka jingmane ba la shu thawnang katba mon, ha kaba ki briew ki leh mynleh sngewrit bad pynshitom beia ia la ka met hynrei kim don bor pat ban synshar ia ki briew na ki jingkwah brai jong ka doh.

Ka Jingim Ba Thymmai Jong Phi

3¹La pynmihpat ia phi na kiba ia p lem bad U Khrist, kumta to pynleit jingmut ia kiei kiei kiba ha neng, ha kaba U Khrist u don uba shong ha ka kti kamon U Blei.²Da kaba mut brai ia kiei kiei kiba haneng, ym ia kiba ha ka khyndew.³Namar phi la ia p noh bad ia ka jingim ba thymmai jong phi la buhrieh lem bad U Khrist ha U Blei.⁴Hooi, U Khrist u long ka jingim ba thymmai jong phi bad ynda un wan, phin iohynta lang ha ka burom jong u.

⁵Namar kata to iehnoh ia ki jingthala jong ka jingim: kaba leh awria, ka jingbymkhuid, ki jingmut thala kiba synshar ia phi bad ki jingkwah jakhlia. Wat nym kwah kangar than ia kaei kaei, namar kata ka long kumjuh hi kum kaba mane bleithaw.⁶Namar ka jingbitar U Blei

ka long pyrshah ia kito ki bym kohnguh ia u, kiba leh ia kat kine ki jingbymman.⁷Phi ruh phi la ju long kumta ha ki por mynshuwa mynba phi la im kum ma ki.

⁸Hynrei mynta to iehnoh ia kiba kum kine ki jingleh na ka jingim jong phi: ka jingbitar, ka jingdom bieit, ka jingleh ne jingkren pynmong ia kiwei, ka jingkren khlem-akor.⁹Wat ialamler paralok, haba phi la law noh ia kito ki jinglong barim kum ka jaiiphong—uta u briew barim bad ki jingleh ba sniew ba phi ju leh.¹⁰Mynta phi la phong ia ka jingim ba thymmai, kata ka jingim keia kaba ia thymmai ha la ka sngi, phi da nang ia san ruh ha ka jingtip ia uta uba thaw ia phi bad ba la nang pynwandur ia phi ban long kum ma u.¹¹Ha kane ka jingim ba thymmai ym don jingiapher shuh la phi dei u Grik ne u Jiw, uba la otsher ne u ba khlem otsher, u pongwei ne u kynja Skuthia, Kam pber la phi de u mraw ne uba laituluid.¹²Kaba kongsan eh ka long, U Khrist keia uba im hapoh jong phi baroh.

Ka Jingim Ba Thymmai Hapdeng Kiwei

¹²U Blei u la jied ia phi bad u la pynlong ia phi u paitlang bakhuid bad baied jong u. Kumta ka jingim ba thymmai jong phi ka dei ban long: kiba leh isyne ia kiwei, kiba leh sbun, kiba sngewrit, kiba jemnud bad kiba iaishah slem.¹³Wat ia batnud iwei ia iwei, hynrei to long kiba ia mab markylliang. Lada phi sngew ba kiwei ki leh bakla ia phi, mab ia ki kumba U Trai ruh u la mab ia phi.¹⁴Nalor kine kiei kiei, kaba kongsan tam ka long ban iaieid paralok, namar ka jingieid ka tehsong lang ia baroh ha ka jinglong kawei bajanai.¹⁵To ai ba ka jingsuk U Khrist kan synshar ia ki jingmut jingpyrkhat jong phi, namar na ka bynta kata la khot khnang ia phi ban long ki dkhoh ha kata ka met.¹⁶Bad to long ruh kiba sngewnguh borabor.

¹⁶Ai ba ka ktien U Khrist kan shongdap kyrhai hapoh jong phi. Da ka jingstad baroh to hikai bad ia syllok markylliang. To rwai ha ki salm, ha ki jingrwai shem mynsiem, ha ki jingkynud ba kynja mynsiem da ka dohnud ba sngewnguh jong phi sha U Blei.¹⁷Kat kaba phi kren ne phi leh, ai kan long na ka bynta U Jisu U

¹² 3:11 Skuthia Ia kiba la tip kum ki riwkhlaw ne ki briew ba dang sahdien.

¹³ 3:15 ka met Ka met ba kynja mynsiem U Khrist, kaba mut ka balang—ki riwkhuid jong u.

Trai jong phi. Ha kiei kiei baroh, to ainguh ia U Blei uba U Kpa lyngba U Jisu.

Ka Jingim Ba Thymmai Ha La Iing

¹⁸Ko ki kynthei, to shakri ia la u jong u tnga da la ka mon sngewbha. Kane ka long kaba dei ia phi kum ki nongbud U Trai.

¹⁹Ko ki shynrang, to ieid ia la ka jong ka tnga da kaba iaishah slem.

²⁰Ko ki khun, to kohnguh ia la ki kmie ki kpa ha kiei kiei baroh. Kane ka long kaba pynsngewbha eh ia U Trai.

²¹Ko ki kpa, to wat pyndiaw ia la ki jong ki khun, lym kumta ki lah ban duh mynsiem noh.

²²Ko ki shakri, to kohnguh ia la ki kynrad ha ki liang baroh wat haba kim don hakhmat jong phi. Wat shu trei smat tang ba kin leh bha ia phi, hynrei to shakri ia ki da ka jingkhuid mynsiem bad da ka jingtieng burom ia U Trai. ²³Ha ki kam ba phi trei, leh ia kaba bha tam kaba phi lah. Trei kumba phi trei na ka bynta U Trai, ym na ka bynta ki kynrad ha pyrthei. ²⁴Kynmaw ba phin sa iohpdiang ia ka bainong na U Trai kumba u la kular. Hood, phi shakri ia U Khrist uba long U Kynrad bashisha jong phi. ²⁵Kynmaw ba jar uba leh bymdei un iohpdiang ia ka jingpynshitom namar kata ka jingleh bymdei. Bad U Trai un leh kumjuh ia baroh khlem da niew shiliang khmat.

4 ¹Ki Kynrad ruh, to leh hok bad to leh kaba dei ia la ki shakri da kaba kynmaw ba phi ruh phi don ia U Kynrad ha bneng.

Kaba Phi Dei Ban Leh

²To aiti smat ialade ha ki jingduwai da kaba ap sharai ruh ha ka da ka jinganguh.

³To duwai lem na ka bynta jong ngi, ba U Blei un plie lad ia ngi ban ialap ia ka khubor jong u sha ki brieve. Namar kane la set byndi ia nga. Hynrei duwai ba ngin iaieuh ban ialap ia ka jingmaian kaba U Blei u la pyntip shaphang U Khrist.

⁴To duwai ba ngan lah ban kren tang ia kata kaba dei khnang ban pynshai ia ka jingshisha sha baroh.

⁵To leh sian ha ki kam jong phi bad kito ki bymngait, khlem da pynsepei noh ia ka por jong phi. ⁶Ai ba ki jingkren jong phi kin long da ka jingjai-jai bad da ka jingstad, ba

kumta phi lah ban pynphai ktien kumba ka dei ia phi.

Ka Khubor Shaphang Kita Kiba Bad U Paul

⁷U Tukhikos u para baieid jong nga ha U Khrist, uba long u nongiarap ba iaieuh bad uba la shakri ia U Trai ryngkat bad nga, un sa iaathuh lut ha phi ia kiei kiei baroh kiba la jia bad nga. ⁸Na kata ka daw nga la phah khnang ia u ba phin ioh tip kumno ngi ia long bad ba yn ioh pyntngen ruh ia phi. ⁹Ngan phah lang bad u ia u Onesimos u para baieid bad ba iaieuh uba na ka kynhun jong phi hi. Kin sa pyntip ha phi ia kiei kiei baroh kiba la jia hangne.

¹⁰U Aristarkhos, uba sah byndi lang bad nga hangne, u ai khublei ia phi. U Markos, u pyrta jong u Barnabas, u ruh u ai khublei ia phi. Nga la dep bthah lypa kumno phin leh ia u Markos, ynda u wan to pdiang sngewbha ia u. ¹¹Ka jingkhublei na u Jisu, ia uba la khot Justos. Dei tang kine napdeng ki Jiw ba la ngeit kiba la iaieuh lang bad nga na ka bynta ka hima U Blei. Shisha ki la long ka jingtngen bakhraw ia nga.

¹²U Epaphras, uwei pat na ka kynhun jong phi uba long u shakri jong U Jisu Khrist, u phah ia ki jingkhublei. U la minot tyngeh ha ki jingduwai na ka bynta jong phi ba phin san sha ka jinglong rangbah ba kynja mynsiem bad ban kot sha kata ka jingkwah jong U Blei. ¹³Nga tip ba u la trei shitom na ka bynta jong phi bad na ka bynta ki nong Laodikaia bad kiba ha Hierapolis. ¹⁴Ka jingkhublei na u Demas bad na u paralok baieid jong phi u Lukas, u nongsumar.

¹⁵To ai khublei ruh ia ki parabangeit kiba ha Laodikaia, kumjuh ruh ia ka Numpha bad ia ka balang kaba iaeseng ha iing jong ka. ¹⁶Ynda la lah pule ia kane ka shithi hadpeng jong phi, pynthikna ba yn pule ruh ha ka balang ha Laodikaia. Bad pule ruh ia ka shithi ba nga la thoh sha ki. ¹⁷To ong ia u Arkhippos, "To pynthikna ba men trei dep ia ka kam kaba U Trai u la shaniah ha me."

¹⁸Ka jingkhublei na nga u PAUL kaba nga la thoh da la ka jong ka kti. To kynmaw ba nga don ha iingbyndi. Ka jingaiie U Blei kan long lem bad phi.